

弘

簡

錄

弘簡錄卷九十二

明刑部員外郎仁和弘齋邵經邦學

一皇清翰林院侍講學士四世孫遠平校閱

天王 宋一之十上

高宗皇帝諱構字德基徽宗第九子母韋賢妃以大觀元年五月乙巳生於大內赤光照室八月授定武軍節度使檢校太尉封蜀國公二年正月封廣平郡王宣和三年十二月進封康王四年加冠出就外第爲人資性明悟博學彊記日誦書千餘言挽弓至一石五斗靖康丁未夢皇兄脫卸御袍圭履賜服而覺金人議割三鎮邀親王爲質欽宗召王諭旨慷慨請行留幹難不軍中旬日責問姚平仲襲營事副使張邦昌恐懼涕泣王意氣閑暇畧不爲動歸後進位太傅充靜江軍節度使又改焦慶

建雄兩鎮金兵復入王雲使還須王再至中書舍人耿延禧偕  
行至磁州守臣宗澤請留磁人殺雲王始不行知相州汪伯彥  
以蠟書請王還朝議拜爲元帥欽宗用侍御史胡唐老言加以  
大字命何桌擬蠟詔遣閣門祇候秦仔持至相拜爲河北兵馬  
大元帥知中山府陳遘爲元帥伯彥與澤副之盡發河北兵命  
守臣自將入衛京師十二月壬戌朔始開大元帥府有兵萬人  
分爲五軍乙亥離相州丙子渡河丁丑次大名府澤以二千人  
先至知信德府梁楊祖以三千人繼至麾下張俊苗傅楊沂中  
田師中皆與焉兵威稍振會復遣曹輔齎蠟詔至方議和好可  
屯兵近甸宗澤請直趨澶淵以解京城之圍伯彥等難之王遣  
澤以萬人先行進屯澶淵王決意趨東平

建炎元年春正月至東平時京城圍久中外莫知存亡陳請四

集皆取決帥府廷遣中書舍人張洎賫蠟詔令王以兵付副帥  
還京統制張俊疑爲金人詐謀止王勿行金果謀以甲士五千  
取王呂好問遣人來白亟宜遠避二月癸未遂如濟州時黃潛  
善安撫高陽關與總管楊惟忠部兵亦至帥府官軍及羣盜來  
歸者號百萬分屯濟濮諸州王遣真定總管王淵引兵三千入  
衛不得進俄聞二帝北遷邦昌僞立承制拜伯彥顯謨閣待制  
充元帥澤與潛善徽猷閣待制副之惟忠爲都統制夏四月孟  
后遣吏部尙書謝克家來迎李綱在湖北遣劉猷持書來訪俊  
澤令詞勸王早正大位興復社稷好問蠟書亦云恐有不當立  
而立者丁卯王舅韋淵復奉大宋受命寶至王跪受遣克家還  
京師趣辦儀物戊辰濟州父老詣軍門勸進澤上言南京乃藝  
祖興王之地四方漕運道里居中遂決意趨應天值元祐皇后

降手書播告中外俾帝嗣統遣兄子衛尉少卿孟忠厚持書遣王在京百官遣馮澥上奉表迎乙亥表再上丁丑澥等至百官三上表許以權聽國事朱勝非韓世忠劉光世皆來會拜光世五軍都提舉庚辰發濟州辛巳次單州癸未至應天府有司備法駕儀仗乙酉邦昌伏罪來歸慟哭請死王慰撫之王時雍等復奉乘輿服御至命有司築壇府門之左五月庚寅朔登壇受命退就府治卽皇帝位禮畢慟哭遙謝二帝改元大赦是日元祐皇后在東京撤簾帝首以攀附恩拜潛善中書侍郎伯彥同知樞密院事辛卯遙尊靖康帝爲孝慈淵聖皇帝元祐皇后爲元祐太后母妃韋氏宣和皇后妻嘉國夫人邢氏爲皇后罷耿南仲馮澥拜李綱右僕射兼中書侍郎趣赴行在好問尚書右丞俄兼門下侍郎惟忠建武軍節度使主管殿前司公事時河

北陝西諸道及帥府兵皆在行朝不相統一始置御營司使潛  
善伯彥副王淵爲都統制光世提舉一行事務罷諸盜及民兵  
爲統制者簡其士馬分蒞五軍以馬忠爲中軍張渙爲後軍皆  
統制率兵萬人趣河間追襲金人薛廣張瑄率兵六千會河北  
山水砦義兵共復磁相戊戌以路允迪爲京城撫諭使耿延禧  
副之壬寅置真州茶鹽司以梁楊祖爲提領癸卯立生日爲天  
申節罷百官上壽金人陷河中府權府事郝仲連死之又陷解  
絳磁隰諸州庚戌宗澤見帝陳興復大計潛善阻之出知襄陽  
御史張所論潛善姦邪必誤大計安置江州六月己未朔綱至  
行在首獻十議始治僭逆罪竄邦昌於潭州尋賜死併誅王時  
雍徐秉哲吳玠莫儔李權顏博文孫覲王紹李回等各流竄有  
差贈李若水霍安國劉幹等官訪諸路死節之士以聞壬戌置

登聞檢鼓院甲子命李綱兼御營使綱請帝英斷於上以問罪  
金人迎還二聖立定規模其所當急而先者在於料理河北河  
東然後中原可保東南可安請於河北置招撫司河東置經制  
司立軍法招置新軍及御營司兵什伍團結癸酉詔陝西山東  
諸路帥臣並依此法團結軍民互相應援增諸縣弓手置武尉  
領之建沿河沿淮沿江帥府十有九要郡三十九次要郡三十  
八帥臣兼都總管守臣兼鈐轄都監總置軍九十六萬七千五  
百別置凌波水軍七十七將造舟江淮諸路置三省樞密院賞  
功司沿河巡察六使辛未皇子生帝從綱言曲赦兩河忠義并  
恤勤王之師人情翕然壬午以張慤同知樞密院事兼提舉措  
置戶部財用乙酉擢宗澤東京留守杜充北京留守丙戌詔募  
陝西河北京東京西兵合十萬人更番入衛命京東西二路造

戰車括買官民馬并勸民出財助國丁亥命張所招撫河北戊子錢蓋經制陝西封趙懷恩安化郡王因召五路兵赴行在秋七月己丑朔以王夔經制河東傅亮副之庚寅詔王淵劉光世張俊喬仲福韓世忠分討劇賊杜用李昱丁順王尊楊進成以次平之乙未以范瑄爲御營司同統制張渙爲河北制置使時議建都綱請營南陽澤請還京城帝從汪黃請決幸東南壬寅奉太后與六宮及衛士家屬先行乙巳手詔京師未可往一意巡幸東南丁未遣官迎奉太廟神主赴行在己酉罷四道都總管丙辰徽宗自燕山密遣曹助賜以手書令便卽眞急救父母帝泣以示輔臣是月關中賊史斌犯興州僭稱帝號八月杭州軍亂陳通執帥臣葉夢得殺漕臣胡昉命辛道宗致討師潰王淵與張俊誅之壬戌轉綱左僕射兼門下侍郎潛嘗右僕射兼



中書侍郎怒兼御營副使癸亥大閱五軍辛未傅亮罷李綱求  
去侍御史張浚論之所議募兵買馬要郡次要郡新軍水軍河  
北招撫皆罷壬午殺太學生陳東布衣歐陽澈乙酉遣兵部員  
外郎江端友等撫諭浙閩湖廣江淮京東西諸路及體訪官吏  
貪廉軍民利病丁亥博州軍亂官儀犯萊州九月己丑建州軍  
亂張員執守臣張勳運副毛奎判官曹仔嬰城自守明年轉運  
判官謝如意誅之壬辰金人犯河陽汜水軍中原大震詔擇日  
巡幸命淮浙沿海諸州增修城壁招訓民兵以備海道揚州守  
呂頤浩繕修城池壬寅遣孟忠厚奉神主赴揚州己酉諜報金  
人欲犯江浙詔駐淮甸募民入資授官并鑄建炎通寶錢始通  
當三大錢於淮浙荆湖諸路時經武郎岳飛渡河大敗金人於  
新鄉進次太行都統制王彥師潰飛引其部曲各爲一軍自罷

諸路經制招撫金人遂分兵入河間雄州又入祁與保州永寧  
順安軍兩河州郡俱爲金有冬十月丁巳朔帝登舟庚午次泗  
州甲戌太白晝見己卯次楚州寶應縣後軍將孫琦等作亂命  
劉光世爲滁和濠江寧府界制置捉賊苗傅副之癸未至揚州  
禁內侍與統兵官相見十一月金徙二帝於中京太定府遣王  
倫等通問與傅雱俱留金營丙午以張懋爲中書侍郎顏岐尙  
書左丞兼樞門下侍郎許景衡爲右丞郭三益同知樞密院事  
密州軍亂杜彥據城殺趙野十二月置講讀官擢楊時工部侍  
郎兼內殿侍講取孟子論治道之語書之座右丁巳詔諸路提  
刑卽轉運司所在分省聚試進士以待親策乙丑詔凡刑賞大  
政非經三省密院不准行金聞帝已渡淮分數道入寇粘罕攻  
河南西京留守孫昭遠與戰不利擁兵南遁少尹阮駿死之詔

里朶圍棣州守臣姜剛之固守解去又陷維與青州臨淄知縣  
陸有常益都張侃千乘縣丞丁興宗俱死市民率土軍射士擊  
敗之金素而去幹雖不與兀朮自燕山由滄州渡河謀趨汴京  
宗澤聞之遣兵保護以俟大兵金夜斷河梁而遁婁室與撒喝  
自同州渡河攻陝西王瓌遁入於蜀遂陷同華汝州破潼關壬  
戌青州兵亂王定殺帥臣曾李序是歲賊李孝忠寇襄陽范瓊  
捕斬之趙萬入常州陷鎮江張俊誘誅之張遇入池州連犯江  
黃二州王淵招降之以所部萬人隸韓世忠丁進圍壽春守臣  
康允之拒却之正誤國罪竄李邦彥耿南仲吳敏蔡懋李忱字  
文虛中鄧望之李鄴及王襄趙野王宗澣范訥於廣南湖北諸  
州又正誣謗宣仁太后之罪追貶蔡確蔡卞邢恕等官子孫不  
許入朝仕宦

時帝卽位方半載而其三十六年施設之規模盡在是矣  
蓋帝本非中興之材曾無撥亂之志祇如民家守成之子  
其童僕一惟囚陋就簡相與偷安始可以容其身至於綱  
紀之僕反以强悍怒而逐之嗚呼以斯世而觀何止一人  
也哉其始終江黃秦檜万俟卨湯思退乃其本性與相投  
合宗澤李綱之徒欲以已意奪之何足續哉何足續哉

二年春正月帝在揚州帥百官遙拜二帝不受賀歲以爲常戊  
子金銀术可陷鄧州范致虛遁安撫劉汲死之兀术犯東京澤  
遣劉行擊却之婁室破永興軍經畧使唐重等死之陷均房州  
守臣楊彥明遁陷鄭州通判趙伯振死之陷潁昌殺守臣孫默  
陷秦州經畧使李復降犯熙河經畧張汲遣都監劉惟甫與戰  
於新店敗之斬其帥黑鋒制司王擇仁復永興軍二月丙辰再

犯東京澤遣統制閻中立等拒戰而死戊子陷唐州甲子犯滑  
州澤遣張撝救之亦死癸酉陷蔡州執守臣閻孝忠丙子陷淮  
寧府守臣向子韶死之時忠臣義士抗守孤城往往而在及乘  
輿益遠諸路氣勢不能相援惟縮手待盡而已加以山東羣盜  
蜂起孔彥舟犯黃州張遇焚真州皆切近行在惟河北盜楊進  
與河東王善感澤忠義解甲而降復起宇文虛中充金國祈請  
使劉誨王貺金國軍前通問壬午罷巡社置振華軍募京東西  
河南北并淮南兵共八萬人三月庚子澤奏河南統制翟進復  
東京粘罕去金婁室陷鳳翔隴西都護張巖死之守臣劉清臣  
遁去遂犯涇原經畧曲端遣吳玠拒戰敗之金東走同華夏四  
月乙丑兀朮復攻西京翟進兵敗世忠丁進等亦敗收其餘兵  
而歸金乘勝入城進與巷戰復引去丁卯陷洛州壬辰孫琦焚

隨州又犯唐州德安五月辛卯諜報粘罕渡河遣世忠與澤率所部迎敵澤恐孤軍難獨進會王彥聚兵太行將圖大舉召之計事奏爲忠州防禦使制置江北軍事指授方畧以俟會合屯於滑州之沙店甲辰金婁宿陷絳州己酉秀州軍亂命張俊討平之六月建州卒葉濃殺妻子縱火突城而出陷福州提刑趙哲招降復叛俊又斬之丁丑詔江浙州軍正兵士兵六之一赴行在沿海練水軍造戰艦是月以知延安府王庶節制陝西六路軍馬曲端爲都統制永興軍王擇仁爲經畧郭瑛所逐奔於興元秋七月汪黃忌宗澤前後二十餘奏請帝還京反疑爲變命副留守郭仲荀伺察之澤憂憤成疾人痛惜之及杜充代爲留守人心始絕望歸京師矣辛丑以春霖夏旱并蝗詔監司郡守條上闕政禁江淮閉糴蠲災甚者田賦錄內外諸軍將士功

八月甲寅鑄三御寶一皇帝欽崇國祀之寶二天下會同之寶  
三書詔之寶李成叛犯宿州遣劉光世討之趙子砥自燕山歸  
得上皇御書以進入對力言講和之害帝與宰相不悅出知台  
州九月丁進叛寇淮西御營統制劉正彥擊降之庚寅賜進士  
李易等四百五十一人及第出身癸巳金人陷冀州將官李政  
死之甲午再犯永興軍瑛棄城退保義谷兵官賀師範死之丁  
未陷相州統制薛廣敗死冬十月閱江淮州郡水軍遣世忠與  
瑁領兵至東平開德府分道拒戰甲子丁進復叛攻汝洛翟進  
擊之於鳴臯山十一月金復圍陝州李彥仙拒却之王辰婁室  
陷延安權府事劉選總管馬忠皆遁通判魏彥明死之王庶遣  
曲端將兵救援次於襄樂不進俄拘庶奪其印乙未陷濮州粘  
罕易其小知州楊粹中固守命將姚端夜襲其營粘罕走僅以

身免攻益急凡三十三日執粹中不屈而死陷開德府守臣王  
棣楊彭年死城中殺戮無遺壬寅就江都縣築壇郊見上帝以  
太祖配赦天下甲辰陷德州都監趙叔取死之庚戌命士庶子  
弟習射補官更川陝茶馬法擢成都轉運趙開爲使罷官買賣  
給引通商如政和法邛州鑄錢監增印錢引十二月犯東平權  
邦彥棄城又犯濟南劉豫叛降甲子陷大名又陷集慶府虢州  
丙寅命修國史己巳賊斬賽寇光山蓋進陷棣州守臣姜剛之  
死之京西李氏請行在降王淵殲其衆留爲將是歲竄余溪薛  
昂再謫耿南仲唐恪

三年春正月庚辰朔帝在揚州以路允迪簽書樞密院事丁亥  
金人再陷青州濰州焚其城而去京東安撫劉洪道入守青州  
辛卯陝西都統邵興敗金人於潼關復虢州乙未張用王善復



叛杜充遣桑仲討之軍敗轉寇淮寧守臣馮長寧却之丙午黏罕陷徐州守臣王復及子倚死之又陷淮陽執守臣李寬世忠初在淮陽將會山東諸將以拒敵粘罕聞之引大軍來迎世忠奔鹽城至沐陽軍潰金分兵萬餘取間道趨揚州使上不得出戊申至泗州守將焚橋遁金遂由招信渡淮縣尉孫暉死之二月庚戌朔聽士民從便避兵命劉正彥衛皇子六官如杭州劉光世阻淮敵未至輒潰違犯楚州守臣朱琳降辛亥陷天長軍壬子急報至帝被甲馳幸鎮江金兵同日過揚子橋明日遊騎至瓜埠太常季陵奉主以行被追失太祖神主王淵請幸杭州留勝非守鎮江願浩制置江淮光世統行在五軍控扼江口惟忠節制江東駐江寧是夕發鎮江次呂城金已入真州甲寅次常州丙辰次平江留王淵守禦丁巳金犯泰州守臣曾挺降戊

午次吳江命勝非兼節制平江秀州軍馬張浚副之以忠訓郎  
劉俊民爲閣門祇候齋書使金軍仍請和己未次秀州庚申次  
崇德願浩從行拜爲同簽兼兩浙制置將兵二千還屯京口命  
俊以兵八千守吳江吏部員外郎鄭資之沿江防扼監察御史  
林之平沿海防扼募海舟守隘壬戌駐蹕杭州癸亥下詔罪已  
求直言赦雜犯令常潤具舟濟衣冠家屬省儀物膳羞出官人  
無職掌放士夫被竄斥者獨李綱不赦丁卯百官入見應迪功  
郎以上並赴朝參戊辰出米十萬斛損直以濟東北流寓之人  
金人焚揚州己巳中丞張浚劾罷潛善伯彥未幾落職以夢得  
與浚爲左右丞庚午詔平江諸路具寓居京朝官姓名以備簡  
拔浙西監司募土豪分守諸嶺隘以扼宣常要害金人去揚州  
辛未詔御營司惟掌行在五軍凡邊防經制並歸三省樞密金

人過高郵軍守臣趙士瑗棄城走潰兵宋進犯泰州曾班復遁  
顧浩遣陳彥渡江襲金餘兵復揚州乙亥召勝非赴行在留張  
浚駐平江三月己卯朔日中有黑子壬寅始沒以顧浩知江寧  
府兼安撫江南東路王淵同簽書樞密院事諸將不平其驟升  
未苗傅劉正彥遂叛勒兵向闕殺淵及內侍康履以下百餘人  
帝登樓加授以官不受迫帝遜位皇子太后垂簾聽政帝移御  
顯寧寺甲申尊爲睿聖仁孝皇帝卽寺爲睿聖宮大赦改元明  
受以張浚兼中書侍郎韓世忠提舉御營司一行事務張俊爲  
泰鳳副總管分其衆隸諸軍分竄內侍藍珪高邈張去爲張旦  
曾擇陳永錫於嶺南諸州呂頤浩張俊張浚同謀復辟約劉光  
世韓世忠起兵問罪庚寅百官拜睿聖宮加傅武當軍正彥武  
成軍皆節度使進光世太尉惟忠少保浚禮部尚書及顧浩並

赴闕吳湛主管步軍司竄潛善伯彥於衛永再徙英州以王孝  
迪爲中書侍郎盧益爲左丞充大金國信使甲午願浩率勤王  
兵發江寧會光世於丹陽丙申世忠自鹽城收散卒至平江假  
浚兵二千共赴行在辛丑賊黨苗翊馬柔吉將重兵駐臨平拒  
勤王兵癸卯太后詔睿聖皇帝稱皇太弟天下兵馬大元帥皇  
帝稱皇太姪監國賜傅正彥鐵券願浩與浚傳檄中外討正二  
賊乙巳太后懿旨睿聖皇帝處分兵馬重事丙午勤王兵並至  
朱勝非議復辟傅等朝於睿聖宮夏四月戊申朔太后詔帝還  
宮與后同御前殿垂簾詔百官起居尊后爲隆祐皇太后太子  
仍還儲位庚戌復建炎號召浚知樞密院事傅正彥並檢校少  
保戰於臨平不勝引兵夜遁辛亥願浩等入覲癸丑勝非孝迪  
允迪岐澂益俱罷以願浩爲右僕射兼中書侍郎李炳尙書右

丞鄭穀簽書樞密院事光世御營副使世忠武勝軍後鎮西軍  
皆節度使並御前左右軍都統制凡僚屬將佐進官有差竄主  
管殿前司王元左言於英賀州承旨馬瓊永州吏部員外范仲  
熊主管機宜時希孟於柳州吉陽軍斬吳湛王世修於市贈王  
淵開府儀同三司乙卯大赦舉行仁宗法度官制皆如舊求直  
言罷上供不急諸物重錄元祐黨籍有未盡者許其家自陳禁  
內侍交通兵官及饋遺假貸借役禁兵干預朝政時建都尙未  
定丁卯帝如江寧世忠追討二賊獲於浦城建陽壬申立粵爲  
皇太子五月戊寅朔次常州辛巳次鎮江遣祭張惇陳東墓恤  
其家乙酉至江寧駐蹕神霄宮改府名建康丁亥以徵猷閣直  
學士知江州陳彥文提領水軍措置江防右司郎中劉寧止副  
之兼議防淮除知廬州胡舜陟淮西制置使王夔淮南招撫使

杜充兼宣撫處置副使節制淮南京東西路升浙西安撫爲制  
使任以康允之建康府路安撫亦兼宣徽太平等州制置以連  
南夫爲之六月己酉久雨求言下罪已詔言四失一昧經邦大  
畧二乏戡難遠圖三無綏人之德四失馭臣之柄罷安石以司  
馬光配饗神宗廟庭庚申皇太后至建康甲戌移御行宮乙亥  
詔諭中外防秋迫近請太后率宗室迎奉神主如江西朕與輔  
臣宿將備禦寇敵中原吏民家屬南去者有司毋禁金人陷磁  
州以叛臣劉豫知東平節制河南州郡盡取山東地惟濟單興  
仁廣濟以水阻尙存至是亦陷及於南京執守臣唐佐又陷沂  
州秋七月賞苗劉功進世忠官論勝非岐允廸罪並落職澈衡  
州居住丁亥下瓊大理獄分其兵隸神武五軍尋賜死子弟皆  
流嶺南己丑以王綢參知政事周望同簽書樞密院事庚寅仙

井監貢士李時雨上書乞還立宗子係屬人心帝怒斥還鄉里  
辛卯升杭州爲臨安府八月粘沒喝將渡江帝遣杜時亮使軍  
前致書願削去帝號奉正朔比於藩臣不答閏月詔議駐蹕地  
遂決吳越之行命諸將分守沿江不復議防淮矣己丑以顧浩  
守左僕射杜充守右僕射並同中書門下平章事辛卯充復兼  
江淮宣撫使守建康王璣隸之世忠守鎮江光世守太平池州  
並受節制胡舜陟爲參謀官知鎮江府陳邦光沿江都制置使  
壬寅發建康復還浙西俊與企宗率軍以從浚次襄陽招官軍  
義兵分屯襄鄧唐鄧以程千秋李允文節制之九月丙午朔日  
食辛亥次平江以湯東野知府事周望總兵張守代簽書樞密  
院光世移屯江州冬十月兀朮分兵一自滁和入江東一自蘄  
黃入江西癸未帝至臨安留七日復入越州庚寅渡江戊戌初

命東南八路歲收經制五項錢輸行在浚時在蜀疏言漢中實形勝之地前控六路之師後據兩川之粟左通荆襄之財右出秦隴之馬號令中原必非於此乃命治兵於興元府以節制五路是月金人陷壽春由黃州渡江光世引軍通知江州韓紹彥城去遂自大冶縣趨洪州江西制置王子獻棄城走十一月犯廬州守臣李會降執王善戊申犯和州守李儔降通判唐瑑死之陷無爲軍守李知幾棄城走又陷六安軍都監王宗望以濠州降壬子太后退保虔州丁巳陷臨江軍守吳將之遁戊午陷洪州權州事李積中降及撫袁王仲山王仲凝皆降太后至吉州金人來犯守臣楊淵遁走犯建昌兵馬監押蔡延世擊却之后次太和護衛楊世雄叛轉犯永豐知縣趙訓之死之金人復至后由萬安陸行如虔州庚申金東兵陷其州守向子志棄城



去壬戌犯建康充閉門不出深水尉潘振死之癸亥陷太平甲子充始遣都統制陳淬等拒戰於馬家渡王瓌軍先遁淬敗績死之充降於金丁卯帝回浙西迎敵次錢清鎮復還以周望同知樞密院事范宗尹叅知政事辛未兀术入建康楊邦乂不屈死之癸酉帝如明州十二月辛巳兀术陷常州又陷廣德殺守臣周烈乙酉犯臨安守臣康允之棄城走錢塘令朱晬死之熙浩進航海策帝乘樓船次定海縣給行在諸軍雪寒錢留宗尹趙鼎以候金使癸巳帝次昌國縣戊戌金琵琶八犯越州安撫李鄴以城降副使郭仲荀走温州衛士唐琦袖巨石擲琵琶八不中死之是歲寇薛慶據高郵桑仲據襄陽李成陷滁州殺守臣向子仍戚方犯鎮江殺守臣胡唐老黃潛善死於英州

四年春正月甲辰朔御舟碇海中金阿里蒲盧渾犯明州俊及

守臣劉洪道擊之帝移台州章安鎮俊引兵同走明州陷副總  
管張思正并洪道繼遁己未兀术入城屠其民襲帝於定海提  
領海舟張公裕擊退之帝遂入温州泊於港口丁卯台州守晁  
公爲棄城遁衛兵及鄉兵相殺縱火肆掠三日辛未命近臣條  
具兵退後措置之策駐蹕之所是月婁宿陷陝州守臣李彥仙  
死之又攻楚州守臣趙立拒守犯邠州曲端遣吳玠敗之於彭  
原陷同州二月乙亥奉安祖宗神御於福州丙子金引兵還臨  
安縱火焚掠抄獲不可勝計遂沿塘路安行陷秀州守臣趙士  
鑒死之陷平江周望湯東野奔遁入城死者甚衆陷常州守臣  
周杞亦遁至鎮江韓世忠方屯金山兀术登金山龍王廟遇伏  
兵幾獲之連戰江中數十合殺獲甚衆因不得渡請盡歸所掠  
假道不許至黃天蕩一夕鑿河趙建康會撻懶遣李堽太一引

兵來援相持四十八日世忠師潰奔還鎮江兀朮屯於六合自是不敢渡江時四京皆沒於金權汴京留守上官悟出奔爲盜所殺中原無復可望矣潭州守向子諲遁將吏王疎劉价趙聿之戰死軍民與巷戰遂屠其城而去陷荆南澧州守臣唐慈王淑棄去鼎州民鍾相作亂自稱楚王殺守臣黃宗權湖北制置傅雱招諭孔彥舟以爲捉殺使三月癸卯彥舟擊敗鍾相併擒其子昂送於行在甲寅遣盧益辛企宗奉迎太后東還辛酉御舟發溫州御營前軍將楊勅叛已巳戚方陷廣德軍殺通判王僞岳飛被之夏四月上次明州金人犯終南縣經畧使鄭恩戰敗死之戊寅入潼關曲端使吳玠拒戰敗績部將楊晟死之端走還涇原癸未帝駐越州中丞趙鼎論罷呂頤浩奉祠戚方圍宣州巨師古擊敗之方引去河北盜鄆瓊率衆來降金兵犯江

西白荆門軍北歸留司統制牛皐潛軍寶豐擊敗之五月甲辰以范宗尹爲右僕射兼御營使張守參知政事趙鼎簽書樞密院事三省密院同班奏事壬子夜紫微垣內有赤雲亘天白氣貫其中時金兵聚淮上甲寅陷定遠縣執問勅不屈死之升高郵軍爲承州分諸路爲鎮各置鎮撫使許世瑱罷典任河南孟汝唐州趙立楚泗漣水軍劉位淦淶趙霖和州無爲李成舒新吳翊光黃李彥先海州淮陽軍薛慶承州天長軍置沿江三路安撫大使顧浩建康路光世兩浙路勝非江州路置司鄂江池三州罷諸路帥臣諸州守臣皆兼制置并安撫使合江南兩路轉運爲都轉運使是月劉超據荆南分兵犯峽州又合叛將彭筠犯復州淮西敗將崔增陷焦湖水砦遂犯太平州守臣郭偉拒却之犯池州統制李貴擊走之諸顧浩降俊遣河東經制王

俊舉兵戰敗金人於襄城復穎昌府六月楊勳犯婺與處州王  
璞遣統制林閏等追襲於東陽軍敗裨將李在死之遂寇建州  
迫泉州周望有罪連州安置甲戌命宰相復兼樞密使罷御營  
司以光世兵爲御前巡衛軍就命爲都統制更御前五軍爲神  
武軍御營五軍爲神武副軍選六百人爲親軍番直禁中戚方  
犯湖州安吉縣張俊破之遂降庚辰增置鎮撫使六人陳規德  
安府復州漢陽軍解潛荆南府歸陝州荆門公安軍程昌寓鼎  
澧州陳求道襄陽府鄧隨郢州范之才金筠房州馮長寧淮寧  
順昌府蔡州壬辰權密州都巡檢徐文率部兵泛海來歸禁海  
舟商販山東慮爲金鄉導甲午置樞密院幹辦官員俄改爲計  
議官乙未郭仲威犯鎮江遣岳飛擊之奔興化縣秋七月張浚  
獻黃金萬兩以助軍用歲輸絹三十三萬有奇以備給賞乙卯

二帝徙五國城洪皓密遣人奉書始知帝卽位之實庚申以岳飛爲通泰州鎮撫使辛酉建州民范汝爲作亂命福建安撫程邁會統制李捧兵討捕之捧尋遁去官軍皆潰又命辛企宗討之張用據漢陽軍沿江措置副使李允文招降之便宜還爲鄂州路副總管以右軍統制馬友知漢陽軍八月辛未朔范克家參知政事壬申李成降詔江州撫納之甲戌詔侍從官日一員輪直進故事開治體者帝以東南事急進三大將官節制諸鎮伺便過淮襲金人復李綱銀青光祿大夫許翰顏岐端明殿學士庚辰太后至自虔州薛慶及楚州趙立淮陽李彥先相繼死承州遂陷詔光世往援遣王德那瓊以輕兵渡江敗金遊騎於召伯埭飛引兵來救大破金人統制靳賽逆戰於港河亦敗之李成吳玠捍禦上流翊棄城去以成兼四州鎮撫使程昌寓遣

將杜湛渡江計羣盜復石首松滋等五縣盜入梅州戊戌復以  
桑仲爲襄鄧隨郢州孔彥舟鼎澄辰沅靖州皆鎮撫使屯潭州  
九月辛丑顧浩入見請益兵命諫王璣巨師古顏孝恭等兵分  
屯境內楊惟忠屯江州召秦鳳將關師古領兵赴行在劉豫偕  
位國號僞齊馮長寧以淮寧附之桑仲入均房安撫使王彥與  
戰於平麗縣敗之是月趙霖復和州李成遣馬進犯興國軍又  
犯江州命惟忠王璣討之荆襄賊趙延壽犯德安陳規拒却之  
又犯郢州據分寧顧浩招降之冬十月辛未秦檜由漣水軍入  
見以爲禮部尙書丁亥鍾相餘黨楊華楊廣舉兵圍桃源犯鼎  
州程昌寓擊却之虔州賊李敦仁舉兵破石城縣江東賊張琪  
犯建康劉洪道招降復叛犯當塗宣州餘杭入據徽州劉忠據  
岳州平江縣白面山王善餘黨祝友擁衆爲亂屯滁州龔家城

渡江大掠十一月慕容洸引金人圍環州劉琦退屯瓦亭甲辰  
趙鼎罷丙午金陷泰州飛渡江退保江陰通州守呂伸亦棄城  
遁顧浩會惟忠與馬進戰不利遣巨師古救江州亦爲所敗詔  
王瓌孔彥舟連援之壬子日南至率百官遙拜二帝歲以爲常  
王彥攻桑仲於黃水再破之房州平以彥爲金均房鎮撫使十  
二月詔諸路轉運括借寺觀田租蘆場三年遣度支員外郎韓  
球括饒信諸州錢糧凡江湖川廣上供皆拘之丁丑馬進分兵  
犯洪州李敦仁犯撫州圍建昌又犯汀州顧浩遣統制閻舉通  
判蔡延世襲擊擒其弟世雄世臣壬辰金人犯熙州總管劉惟  
勳敗之殺五千餘人甲午再犯惟輔軍潰被執死之丁酉謝勣  
招降范汝爲以補民兵統領是歲始定差役法上初在河朔親  
見閭閻之苦一充役次卽至破家卽位民加講議以二十五家



爲一保十六保爲一都內選財力高富者二人充都保主一都盜賊烟火之事其次有保長品官一品限田五十頃至九品五頃免差子孫廕盡則同編戶太學生及得解試者許募人充役軍丁及女戶孤弱悉免

紹興元年春正月乙亥朔以大宋中興寶成改元帝在越州升爲紹興府不受朝賀時盜賊橫肆李成據江淮尤强悍命俊爲江淮路招討使飛副之江州陷守臣姚舜明棄城走端明殿學士王易簡等二百人皆遇害曹成陷漢陽軍李允文招之入鄂州復趨江西丁巳願浩遣王璣崔增擊李成於湖口大敗之及惟忠引兵趨江州二月改行宮禁衛所爲行在皇城司定歲祀天地社稷如奏告之禮己卯日中有黑子四日乃沒置秘書省召范同等試館職辛巳以秦檜叅知政事壬辰雨雹丙申詔諸

路提刑司以八月類省試是月宜章縣民李冬至一作亂犯英連韶郴諸州祝友降以知楚州命光世分其軍成黨馬友犯筠州守臣王庭秀棄城辛未犯臨江軍守臣康倬遁犯鄂州總管張用拒却之大掠漢陽而去過岳州守臣吳錫遁友據之荊湖安撫向子諲說降共討李冬至二平之三月俊趙豫章與沂中飛大敗馬進復筠州成聞進敗自引兵來遇於樓子莊又大破之成勢迫絕江而去遂復江州詔奪成官募人擒斬赦其脇從有男子崔紹祖詐稱王子受上皇詔爲天下兵馬大元帥捕獲伏誅乙丑進復寇江州沂中趙密引兵追擊又大敗之成奔斬州先是金人犯秦州玠擊敗之又犯西寧州守臣俱重迎降張中孚以原州叛降圍環州鄜延將李永琦叛犯慶陽撻懶破階州迫興州浚退保開州以張浚爲四川制置使與子羽趙益昌

庶知興元兼節制陝西諸路撻懶謀再渡江梁山泊漁人張榮  
擊敗之撻懶奔還楚州退屯宿遷縣尋北去榮先聚舟數百入  
通州以劫金人爲名借補武功大夫結水寨興化縮頭湖以伺  
光世爲告捷於朝除知泰州夏四月壬申太白晝見乙亥光世  
復楚州浚復階州戊寅劉超犯澧州杜琪棄去超入據之庚辰  
隆祐皇太后崩羣臣三上表始聽政五月孔彥舟棄潭趨衡州  
馬友擊敗之以權荆湖副總管移屯漢陽六月己巳需承直修  
武郎以下官備賑糴乙亥月犯心上虞縣丞婁寅亮上書請選  
太祖後以備儲嗣丁亥崇安民廖公昭合汝爲餘黨熊志寧建  
陽民丁朝佐陷二縣遣辛企宗移軍討之己丑南安賊吳忠作  
亂廣賊邵慶龔富圍南雄州守臣鄭成之率兵民以拒直至南  
劔是月知虢州邵興爲河南統制董先所破走興元先遂取商

號二州時關隴六路盡屬劉豫止餘階成岷鳳洮五郡鳳翔之  
和尚原隴州之方山原叛將趙彬復犯耀州圍慶陽守臣趙澄  
楊可昇擊敗來降張浚承制拜爲陝西轉運使涇原都監李彥  
琪爲本路副總管尋叛去秋七月後軍將胡江等叛破玉山弋  
陽永豐三縣遣樞密院準備將領徐文討之甲辰命汪藻等修  
日曆戊申韓世清追襲張琪復祈門縣琪犯饒州閻阜擊敗之  
降其黨姚興癸亥范宗尹罷虛相位八月戊辰張守等上紹興  
重修勅令格式丁亥秦檜拜相復置賞功司募人往京東河南  
伺察金齊動止知鄂州曹成掠湖西犯沅州與知復州李宏合  
屯劉陽旣而攻宏奔於潭州九月長星見以葉夢得兼壽春等  
六州宣撫使討劉豫丁未詔歲再遣使省謁諸陵因撫同河南  
將士庚戌命宗室士芑朝饗温州太廟辛亥合祭天地於明堂

以太祖太宗並配大赦癸丑召顧浩赴行在以爲左相兼樞密使辛酉詔四方建策能還兩宮者賞以王爵冬十月李回罷以孟庾叅知政事置行在太宗正司初除宗室爲從官壬午初置見錢關子招人入中以給軍食范汝爲復叛入建州犯邵武光澤追辛企宗三官以孟庾爲福建江西荊湖宣撫使副以世忠討之甲申劉超降以守光州知承州王林禽張琪伏誅壬辰僞齊寇廬州守臣王亨破之斬僞將王世冲十一月續紹興太常因革禮置管田官行屯田民兵法減歲租三之二俟三年復舊庚戌富直柔罷命侍郎李光節制臨安府內外諸軍壬戌曹成犯安仁執安撫向子諲攻陷道州守臣向子恣棄賊走前知廊州李惟德以岷州來歸玠始遣人通書夏國十二月復置樞密院都承旨汝爲黨葉澈寇南劍州守臣張翥大破之己巳遣

傅崧卿淮東宣諭駕部員外李愿川陝諭撫戊寅彗星出求直言已卯詔分兩浙東西路置提點刑獄庚辰桑仲寇復州守臣祖通棄去其黨李橫寇金州王彥拒戰馬郎嶺大破之均州平辛巳鑄紹興通寶錢復置廣西提舉茶鹽司增諸路榷酒以備軍費知海州薛安靖殺偽巡檢王企中率軍民以城來歸知龍州范綜統制雷仲舉兵復水洛城偽齊王彥充攻壽春蔡州褒信縣弓手許約叛據光州

冊曰年號紹興用慚康濟奸檜之來正相默契殷武漢光  
可堪流涕

弘簡錄卷九十二

終

弘簡錄卷九十三

明刑部員外郎仁和弘齋邵經邦學

皇清翰林院侍講學士四世孫遠平校閱

天王 宋一之十中

高宗紹興二年春正月癸巳朔帝在紹興甲午復制科丁酉獨  
諸路逋稅韓世忠收建州范汝爲自焚死餘黨悉平丙午帝如  
臨安劉豫兵犯伊陽翟興及其將李恭合擊敗之楊惟忠誘誅  
楊勅二月以李綱爲湖廣宣撫使時曹成犯郴州楊華擾鼎澧  
潭詔立賞格禽捕首惡赦貸脇從丁丑分降盜崔增李捧邵青  
趙延壽李振單德忠徐文所部兵爲七將名御前忠銳軍隸步  
軍司非樞密奉旨不許調遣帝自巡幸以來經延久輟丙戌復  
御講殿置著作郎一員修日曆三月桑仲上疏乞正劉豫之罪

願協力恢復京師呂願浩信之屢請出師身自督戰戊戌仲如  
郢州調兵爲其黨霍明所殺帝憫之授其二子將仕郎河南楊  
偉亦殺翟興降於僞齊夏四月賜進士張九成以下二百五十  
九人及第出身戊子知壽春府陳下及鈐轄陳寶等舉兵復順  
昌爲僞齊所逐并矢壽春金人陷慶陽執降楊可昇又攻方山  
原統制楊政來援引兵犯隴安縣吳璘等擊走之復自水洛城  
來攻政等又敗之庚寅豫徙居汴京知商州董先叛降王彥破  
之於馬嶺關復商州閏月太平軍陸德亂知池州王進討誅之  
己未詔自今明堂專祀昊天上帝以太宗配李橫李道爲桑仲  
報讐合兵圍郢州霍明遁去以橫權襄郢道權郢監皆鎮撫使  
五月庚午詔修建康行官辛未選太祖後秦王德芳六世孫子  
傅之子伯琮育於禁中丙戌置修政局命秦檜提舉詔侍從臺



省寺監官監司守令條具省費裕國殫兵息民之策命百官輪對逾月罷之六月李宏引兵入潭州殺馬友世忠遣解元巨振復執以歸戊戌詔孟庾還世忠移屯建康飛駐江州起復翟琮鎮撫河南孟汝唐州孔彥舟叛降偽齊甲寅召願浩入朝以孟庾同都督江淮荆浙諸軍事秋八月甲寅彗出胃帝避殿減膳戒輔臣修閔政罷修建康行官願浩以爲秦檜黨盛所致連罷胡安國等二十餘人臺省一空俄併罷檜榜之朝堂示不復用九月廢修政局辛酉大赦求直言壬戌王倫使金還倡爲和議遣潘致堯等通問附茶藥金幣以進兩官至楚州通判劉晏劫奔劉豫時敵舟自海來有二道由北岸來者至明之定海由南岸來者至秀之海鹽朝命置沿海制置司以呂源領浙東仇愈領浙西皆兼福建一路甲戌彗沒詔墨勅有不當者許三省密

院奏稟給舍繳駁臺諫論列有司申審庚辰命福建提舉茶鹽  
官兼領市舶司壬午遣監察御史劉大中胡蒙朱異明察薛徽  
五人宜諭江浙湖廣福建諸路督察官吏平反獄訟觀風問俗  
務令民被實惠癸未新作行宮南門戊申立淮浙鹽法增其  
算乙酉太白晝見冬十月置饒州馬監錄孔端朝爲秘書正字  
班度量權衡於諸路禁私造知建昌軍朱芾禽斬石陂賊余照  
顏孝恭復招降餘黨李寶等十一月馬友黨郝通率衆五萬來  
歸步諒郝最亦降王進吳錫禽王浚等楊么據洞庭湖督劉洪  
道程昌寓解潛會兵捕討昌寓遣杜湛討楊欽等敗之殺三千  
餘人是月開師古又敗僞齊兵於抹邦山十二月己丑巨師古  
引兵入廬州執王亨送行在己亥金人侵熙泰關師古擊敗之  
癸卯川陝類試發解周謨等十三人以便宜賜進士出身甲辰

罷汝宣撫仍知樞密院金人犯商州守將邵隆退屯上津又犯  
和尚原將士乏食自潰吳玠收砦棄去陷金州王彥楚散聚退  
保西鄉皮賊謝達犯惠州陳頤陷汀州又犯梅循二州圍湖州  
不下引兵趨江西

三年春正月丁巳朔詔春秋望祭諸陵孟庾自建康入朝移督  
府於鎮江江西將李宗諒誘戍兵寇筠州李綱遣統領趙進擊  
降斬之李橫敗僞齊兵復汝州又被穎順軍僞知軍閻和降復  
穎昌府遣人奏捷拜爲神武左軍副統制京西招撫使許便宜  
行事乃以鄭州鈐轄牛皐爲蔡州州鎮撫使彭玘知汝州劉光  
世遣鄒玘屯泗州以爲橫聲援辛未遣渾天儀癸酉復舉五帝  
日月之祀并祭大火丁丑登萊山崇統制范溫率部兵泛海來  
歸二月丁亥朔升桂州爲靜江府辛卯李通爲王全所殺餘黨

劉德剛舒州戊申虔吉盜連兵犯循梅汀州詔岳飛合兵捕之  
三月議大舉伐金以趙鼎爲江西安撫制置大使世忠淮南東  
路光世江南東路皆宣撫使傳檄諸軍收復東京已巳金人復  
陷穎昌橫敗走收軍還鎮夏四月丁亥僞齊知虢州董震及統  
制董先來歸以震權商虢陝州鎮撫使甲午僞知唐州胡安中  
來歸丙申僞齊李成攻陷虢州董先牛臯奔襄陽辛丑荆南統  
制羅廣率兵捕楊么不克而還么衆益盛自稱大聖天王立鍾  
相少子子義爲太子朝命王琰會諸軍進討劉忠爲部下王林  
所殺傳首行在戊申以浙西史康民所部兵爲忠銳第九將王  
林所部兵爲忠銳第十將五月丙辰以翟琮爲河南府孟汝鄭  
州董先爲商虢陝州皆鎮撫使壬戌潘致堯使金還言欲得重  
臣通和以取信乃遣韓肖胄等充金國軍前通問使遂喪出師

之議安化蠻犯邊廣西經畧使許中發兵擊之戊辰知建昌軍朱芾討南豐縣賊誅其魁黃琛乙亥詔金國方議和禁邊兵侵犯齊境及招納淮北人并中原軍來歸者已卯世忠請以大軍還鎮江統制解元戍泗州餘屯江北宣撫副使王似盧法原至閬州張浚解任及子羽王庶劉錫俱赴行在諭金牛功玠及子羽王彥各進官僚屬將帥關師古等第賞有差辛巳罷宣撫司便宜黜陟六月岳飛遣張憲王貴禽斬虔賊彭友餘悉降巨師古坐違世忠節制除名編管廣州庚寅降川陝囚罪丁未復置六部架閣庫及國子監博士弟子員已酉曲赦虔州命飛班師留兵三千屯駐虔廣彈壓盜賊金人圍方山原王似命玠發兵救之秋七月四川霖雨地震已未復博學宏詞科初許任子就試丁卯詔復元祐宰執呂大防等官爵贈諡及訪求累朝勲臣

曹彬等子孫以備錄用己巳早詔減膳禁屠弛工役罷苛擾八月己丑詔飛赴行在留兵萬人戍江州甲辰以雨暘不時蘇湖地震詔求直言監司郡守凡遇災異卽具奏毋隱乙巳復置史館修撰直館檢討官命郎官兼領著作并佐郎九月戊午願浩罷庚申川陝統領官吳勝敗僞齊兵於黃堆砦甲戌僞齊王彥寇徐宿二州乙亥上以諸將各擁重兵而無分地始命光世於江東淮西置司池州世忠建康淮南東路置司鎮江皆宣撫使璿荆南鄂岳潭鼎澧黃漢陽置司鄂州飛江南西路舒蘄州置司江州皆制置使主管殿前司郭仲荀知明州兼沿海制置使神武中軍統制楊沂中權殿前司己卯吳勝克蓮花城冬十月甲午郤大理國入貢禁州縣擅增置稅場丁酉立守令考課法凡殘破州縣視戶口增損以爲殿最流民復業以墾田多寡額

定賦役己亥李成陷邳州辛丑南丹蠻莫公晟圍觀州焚寶積  
監殺知監陳烈壬寅僞齊兵逼襄陽橫糧盡奔荆南道亦棄城  
去甲辰琰討湖賊戰於鼎口不利引兵還鄂州增吳全戰死統  
制石世達杜湛破黃誠於龍陽洲僞齊陷邳州守臣李簡棄城  
去王彥先至北壽春將渡淮光世扼馬家渡璵駐無爲軍互爲  
聲援賊乃還十一月乙亥罷諸路類省試復元祐十科舉士法  
并置宗正少卿諸寺監丞十二月辛巳朔臨安屢火勝非求罷  
不允帝自卽位遣使凡六七輩未嘗報聘己酉胄始偕金使  
李永壽王翊俱來

四年春正月辛亥朔帝在臨安遣章誼等金國通問詔諸路將  
帥毋輒弛備淮南津渡尤慎譏察己未程昌寓遣杜湛王渥攻  
楊太破皮真砦金犯宥昌臨江砦及花石峽關師古遣統領劉

散分兵拒却之戊寅犯神全砦沿北嶺至大散關二月丙戌湖北軍賊檀成犯長陽縣解潛遣統領胡勉捕斬之己丑田政犯陝州潛遣統制王恪擊斬之庚寅金犯兩當縣辛丑犯仙人關玠率楊政吳璘田晟王喜與戰大敗之元术遁去癸卯詔以射殿權爲景靈宮四時設位朝獻三月壬戌召孟庾還兼樞樞密院事罷都督府以其兵屬張俊丙子進王似資政殿學士川陝宣撫使盧法原端明殿學士與吳玠並充副使開師古熙河蘭廓路安撫制置使夏四月庚辰朔趙鼎再任四川總領乙酉作明堂行禮殿於教場川皇祐典禮合祀天皇帝神州地祇以下諸神丙戌玠復秦鳳隴州關師古叛以洮岷二州降於僞齊丙午知壽春府羅興叛降僞齊五月癸丑命范冲重修神哲兩朝實錄更國史日曆所爲史館置校勘官岳飛已平襄漢因奏



金賊志已驕情所愛惟金帛子女豫雖僭僞猶不忘宋若以精兵二十萬直搗中原恢復故疆誠易爲力襄陽隨郢地皆膏腴廣行營固其利甚溥帝從之詔淮南帥臣皆兼營田使守令以下兼管營田乙亥敵攻金州彥遣統制許青等與戰於漢陰敗之又敗金兵於洵陽縣丙子復選宗室子彥之子伯玖育於禁中六月乙未太白晝見詔御前軍並隸樞密院秋七月壬子命吳玠通信夏國癸丑湖賊楊欽等攻破鼎州社木砦官軍敗却守將許筌戰歿八月朔賊夏誠等犯枝江縣解潛遣蔣定舟敗之李全又犯公安潛遣統制林潤等擊斬之辛巳玠遣統領姚仲克隴城縣壬午王璣降光州觀察使以飛代節度清遠軍併制置湖北荆襄潭州以討湖賊戊子王似罷知成都命趙鼎都督川陝荆襄諸軍事乙未復遣魏良臣等使金丙申毀王安石

舒王誥九月辛酉饗明堂大赦庚午金齊合兵自淮陽分道來犯邊報驟至舉朝震恐壬申渡淮楚州守臣樊叙棄城去世忠自承州退保鎮江上留趙鼎爲相兼知樞密院事沈與求叅知政事冬十月丙子朔定策親征以張俊爲浙西江東宣撫使移劉光世建康軍車駕擇日進發丁丑以孟庾留守行宮留統制王進一軍及神武中軍五百人隸之己卯世忠復入揚州金人犯滁州又圍亳州壬午僞齊犯安豐縣癸未復召張浚提舉萬壽觀兼侍讀甲申復王玠建武軍承宣沿江制置等使丙戌命胡松年詣江上會諸將議進兵戊子世忠擊敗金人於大儀鎮追奔至淮而還己丑成閔解元合兵敗金人於承州北門復陷濠州守臣寇宏棄城走光世移軍太平丙申命後宮白溫州泛海如泉州戊戌帝御舟發臨安劉錫楊沂中以禁兵扈從己亥

世忠奏捷庚子俊由鎮江率兵如建康壬寅帝次平江加贈陳東歐陽澈官落汪伯彥觀文殿學士帝欲臨江決戰鼎止之乃命世忠沂中分兵控扼沿海要地癸卯置沿江烽火賜扈從諸軍錢借江浙坊場錢一界以備軍費乙巳仇念遣將孫暉擊敗金人於壽春復霍丘安豐二縣十一月戊申太白晝見壬子下詔聲劉豫罪諭親討之旨以厲六師甲寅僞知州許約破石額山砦入據光州乙卯世忠夜遣兵劫永州破金營金兵又犯六合全椒等縣己未命張浚赴江上視師部分諸將而身留鎮江以節度之癸亥陷滁州光世遣王德擊敗之於桑根己巳又遣選鋒將王師晟復南壽春府執僞齊知府王靖十二月乙亥朔良臣王繪自軍前還言金帥索銀絹犒軍遂不復遣戊寅命督府右軍統制李貴部兵扼福山鎮中軍統制王進屯泰州防拓

通泰壬辰金齊兵逼廬州仇念嬰城求援飛遣徐慶牛阜往赴  
敗走之光世亦遣靳賽戰於慎縣俊遣張宗顏敗之於六合庚  
子金人退師是歲循梅潮惠四州襄陽六郡及興元洋州淮南  
永楚泰等州各免被兵租役

五年春正月乙巳朔日食帝在平江府詔宰執及行在職事官  
各條上攻戰備禦措置綏懷之策李綱上疏又獻建炎時政記  
金人自六合北歸俊遣統領楊忠閔王進夾擊之於淮南岸淮  
東統制崔德明又敗之於盱眙乙卯賞廬泰一路守禦官并沿  
江監司供億有勞各進一等已未免淮南官吏去職之罪仍令  
還任及減罪犯庚申置諸州教場選兵專習弓弩立格按試壬  
戌論功世忠爲中興第一與光世皆加少保俊開府儀同三司  
各辭赴鎮賜以酒令世忠與光世釋憾皆感激奉詔甲子鄆瓊

復光州許約降乙丑置提點兩淮公事官并置淮西市易務兼  
領刑獄茶鹽漕運罷舊茶鹽提刑司癸酉僞知亳州馬泰犯光  
州權州事王萃拒之是月金主晟殂立昞孫直二月丙子岳飛  
自池州入朝論廬州功拜兼荆襄制置使以討楊太常州布衣  
陳得一造新曆成賜名統元丁丑帝還臨安丙戌以鼎與浚並  
爲左右僕射同平章事兼知樞密院都督諸路軍馬丁亥吳璘  
攻收秦州執僞齊守胡宣撒離曷來援楊政復擊敗之己丑始  
建太廟於臨安遣太常少卿張洙往温州迎神主己亥范冲上  
神宗實錄考異庚子詔翰林學士孫近胡交修類編臣僚章疏  
僞齊商元寇信陽軍守臣舒繼明死之閏月丁巳撒離曷將犯  
秦州玠遣部將牛皓伺之遇於瓦五谷戰死丁卯命孟庾提領  
總制司措置東南財用惟四川不與又置檢察財用官命密院

計議呂用中等分使兩浙兩江等路三月御書無逸圖置講殿  
開講命朱震范冲講春秋左氏傳孫近唐惲講論語孟子鄭  
胡交修讀三朝寶訓又賜趙鼎御筆尚書語以上古君臣交相  
戒勅期與共由此道及書車攻詩賜輔臣日思勉修政事攘寇  
亂乙未總制司奏椎鉛錫鬻民間田宅契紙事皆肇此夏四月  
罷諸州鎮撫以王彥知荆南府戊申神主始至奉安於太廟壬  
子訪周後柴叔夏襲封崇義公己未更紹聖免役保正長法甲  
子太上皇崩於五國城凶問未至遣何鮮復通問胡寅言其無  
益竟遣之丙寅上朝景靈宮始祔祭惠恭皇后五月乙亥謁太  
廟己丑孟庾知樞密院事六月甲辰湖賊楊欽全琮劉詵相繼  
降己酉建國公出就資善堂聽讀命廣學官教內外宗子內山  
錢帛賜宗室貧者癸丑久旱減膳祈禱禁諸路科率罷檢察財

用官岳飛攻湖賊水砦其將陳瑁并餘黨劉衡等皆降併斬夏  
誠丁巳楊太赴水死黃誠斬其首挾鍾子儀周倫詣督府降湖  
湘悉平得戶二萬七千悉遣歸業丁卯免沿湖民逋租及湖南  
江西二十二州上供租稅釋徒以下囚秋七月戊寅獎諭岳飛  
撫勞將士趣張浚還朝己卯孟庾罷沈與求樞樞密院事兼措  
置財川壬午僞齊兵寇湖陽執唐州守臣高青復釋之甲午世  
忠復鎮淮軍擒僞守王拱八月己未僞齊復陷光州九月辛未  
朔罷總制司所增諸色頭子等錢乙亥賜進士汪洋以下二百  
二十餘人及第出身僞齊兵寇固始縣統領華旺戰却之尋復  
光州乙酉趙鼎上重修神宗實錄壬辰官元符上書邪等范柔  
中等二十七人子孫召解潛還以所部兵隸馬軍司冬十月戊  
午復川陝類試合格者依殿試例推恩乙丑僞齊兵寇連水軍

世忠遣統制呼延通等逆擊敗之十一月庚午朔初置節度使以下金字牙符以給將帥立戰功者命州縣造戶帖令民自實地宅田畝之數官賣之以益軍費無物產者罷之癸酉詔守臣死節昭著者毋限品秩並賜諡戊寅有事南郊祫享太廟壬午出宮女於外示以省約禁服飾用翠羽十二月庚子改神武四軍及巡衛軍號行營五護軍辛丑以都督府兵隸三衙命左右司密院檢詳官叅考中興已行條例修爲定法是歲虔賊周一隆降復叛海賊朱聰降以爲水軍首領陳威犯雷州官軍敗績澧州賊雷德進降

六年春正月己巳朔帝在臨安命甄別元祐黨籍立臺省寺監與監司守令除擢更迭出入丙戌張浚復出視師國威大振甲午江湖福建浙東饑命監司帥臣分選僚屬寬恤賑濟及提舉



常平官躬行檢察戊戌鬻官二月甲辰置行在交子務復諸路  
市易務己未戶部侍郎劉寧止如鎮江府總領三撫司錢糧三  
月戊辰朔初收官告綾紙錢號均房民兵曰保勝又賜招刺三  
千人名必勝軍己巳韓世忠盟司山陽趣岳飛赴鄂州措置軍  
事壬午金齊兵犯漣水軍世忠擊敗之夏四月甲辰僞齊兵陷  
唐州圍練判官扈舉臣推官張從之死之五月戊戌朔金星犯  
畢占有邊兵賜吳玠四川戶帖錢十萬緡犒軍乙酉復造見錢  
關子罷交子務收免丁錢六月乙巳朔夜地震求直言甲寅命  
俊渡江撫淮上諸屯光世自當塗進屯廬州飛自九江進屯襄  
陽沂中屯泗州秋七月光世復壽春府癸未駕臨建康以撫三  
軍圖恢復癸巳經理商號拜郭浩永興軍經畧安撫使兼知金  
州開門舍人邵隆知商州聽浩節制八月飛遣牛皐破僞齊鎮

汝軍擒其守薛亨甲辰詔諭將士親征命解潛等帥精兵扈從  
主骨步軍司邊順留兵守臨安知府梁汝嘉爲巡幸隨軍都轉  
運使丁未復起秦檜奉醴泉觀祠留守行宮權叅決尙書省樞  
密院事辛亥帝奉神主發臨安己未預借江浙民來年夏稅絕  
帛折米輸官俊城盱眙進屯泗州飛及僞齊李成孔彥舟連戰  
克蔡州僞守劉永壽舉城降九月丙寅朔帝至平江府權奉安  
神主於龍仁寺命職事官一員輪對壬午飛遣王貴郝晟董先  
復號州盧氏縣因欲進軍恢復中原不許還鄂州鎮戊子以戶  
部郎官霍蠡總領岳軍錢糧庚寅浚入奏復還鎮江辛卯賞鎮  
江功進統制王德等官并立賊徒相招首罪賞格冬十月劉豫  
聞親征告於金亶引兵三十萬分三道入寇帝從後議屯淮南  
以蔽大江詔併以淮西軍屬張俊楊沂中亦聽節度與張宗顏

等分兵禦之戊戌沂中至濠州賊兵攻壽春府芍陂砦守臣孫  
暉拒戰敗之壬寅梁汝嘉兼浙西淮東沿海制置使王彥副之  
劉猷爲沂中大敗脫身而遁麟在順昌聞之亦收砦去王德沂  
中追至南壽春而還孔彥舟亦解光州圍而去金甌聞之始有  
廢豫之意戊申命解潛守青龍港口癸丑俊及沂中引兵攻壽  
春不克壬戌日中有黑子十二月甲午朔浚入見請幸建康鼎  
請還臨安二相議不合鼎求罷辛丑城南壽春府甲辰命督府  
叅議呂祉如建康措置移蹕丁未賞淮西功加張俊沂中等官  
戊申召檜赴講筵供職以孟庾提舉萬壽觀代爲行宮留守已  
未命募辰沅靖澧四州刀弩手以閒田給之庚申賜太原死節  
安化郡王王稟家田十頃是歲賑湖南饑賊黃旺犯桂陽監福  
建發水軍討海賊鄭慶摧鋒軍統制韓京襲破惠州賊會充降

之

七年春正月癸亥朔帝在平江下詔移蹕丁卯賞破敵功遷張

浚特進兼樞密使

自元豐停  
革始復

丁丑解潛罷以劉錡權主管殿前

馬步軍司公事庚辰築采石宣化渡二城丁亥何鮮范寧之奉

上皇及寧德皇后凶問至己丑帝成服辛卯夜東北有赤氣如

火二月癸巳朔日食求言帝欲服喪三年百官奏遵舊制詔於

外朝勉從所請官中仍行三年之喪庚子遣王倫等使命迎奉

梓宮丙午吳玠盟銀會子於河池丙辰始御便殿果州守臣宇

文彬等進禾登九穗圖龍奪其官丁巳岳飛入見己未發平江

三月癸亥朔抵丹陽世忠來見卽命扈從飛次之甲子次鎮江

沂中來見命總領彈壓巡幸事務辛未至建康詔常程政事從

叅知政事陳與義分治癸酉減流罪以下囚獨逋賦及下戶身

丁錢已卯遙尊帝母韋氏爲皇太后庚辰孟庾罷呂頤浩兼行  
官留守甲申劉光世罷以其兵隸王德是春廣西大饑李寶變  
爲桃夏四月修濬建康城池建太廟改臨安府太廟爲聖祖殿  
岳飛請督府議事不合因請解官持服庚戌令督府叅議張宗  
元權領飛軍壬子浚以淮西新易帥自往太平視師五月丁卯  
詔李綱趣捕虔吉諸盜責諸縣各募兵訓練壬申命禮官舉文  
宣武成熒惑壽星嶽鎮海濱農蠶風雲雷雨之祀丙戌僞齊陷  
隨州六月屢詔起飛趨朝上慰安之起復舊職秋七月癸酉大  
旱禱於天地宗廟社稷命中外臣庶實封言事擲諸路民積年  
逋租建康疫遣將行視給貧民錢葬死者并疎決滯獄乙酉詔  
權正社稷之位八月戊戌鄆瓊叛奔降劉豫飛乞引兵討瓊不  
許詔俊屯廬州飛屯江州爲淮浙聲援獨瓊所掠廬州壽春租

稅甲辰復名鼎爲萬壽觀使兼侍讀乙卯賜飛軍錢十萬緡招  
歸正復業人耕湖北京西開田九月甲子上太上皇帝諡曰聖  
文仁德顯孝皇帝廟號徽宗落浚職罷都督府丙子復鼎相位  
己卯朝獻聖祖於常朝殿庚辰饗太廟辛巳合祭明堂大赦冬  
十月庚寅朔開經筵丁酉僞齊犯泗州守臣劉綱擊走之丙午  
命戶部郎官薛弼霍鑑總領江西湖廣五路財賦壬子呼延通  
王權等襲敗金人於淮陽軍閏月乙丑劫江東路月椿錢發米  
振京西湖北饑民丙寅召處士尹焞始至入見帝慰勞之庚辰  
世忠引兵渡淮逆擊金人於劉令莊敗之辛丑李綱罷癸未復  
漢陽軍十一月丁未金廢劉豫癸丑詔來春復幸浙西十二月  
庚午世忠留屯楚州癸未王倫等使還復往議和甲申城泗州  
廣州盜蔡毋謹和尚陷三水鎮劉領帥師誅之

八年春正月戊子朔帝在選康詔方議和禁沿海州郡遣人過  
淮招納辛丑僞齊知壽州宋超來歸丁未大閱二月庚申日中  
有黑子癸亥駕發建康戊寅至臨安始定都三月壬辰復相秦  
檜夏四月庚申初置戶部和糴場於臨安五月庚戌竄內侍羅  
宜丁未金使烏陵思謀石慶充與倫等偕來己酉命王庶巡視  
邊防至淮南檄張宗顏屯廬州巨師古屯太平韓世忠分屯泗  
州天長劉錡屯鎮江六月壬戌賜衍聖公孔玠衢州田癸亥鼎  
上重修哲宗實錄壬申賜進士黃公度等三百九十五人及第  
出身秋七月乙酉朔復命王倫監公佐使金辛亥彗出東方八  
月詔邊臣各嚴飭邊防無忘捍禦丁丑彗滅冬十月丁丑倫與  
金使張通古蕭哲來言歸河南陝西地徐議餘事十一月乙亥  
復以倫爲國信計議使馮機副之辛丑詔金國遣使欲朕用已

就和其他侍從臺諫條奏從官張燾晏敦復魏江會同李爾遜尹焞梁汝嘉樓照蘇符薛徽言御史方廷實館職胡珵朱松張擴凌景夏常明范如圭馮時可趙雍許忻皆言不可辛亥貶密院編修胡銓十二月己未命叅知政事李光押榜諭衆甲戌韓肖胄奉表全國報謝施廷臣主和議擢爲侍御史熈及熈復執奏不行庚辰帝以方居諒陰不御殿命秦檜攝衆宰受書以進納於禁中是日預作慈寧宮

九年春正月獨相秦檜丙戌以兩國通和大赦河南新復州軍蠲民租三年徭役五年官吏並不易置帝雖聽檜尙疑金詐命宰執督守臣專撫遺民勸課農桑各因其地以食因其人以守不可移東南財賦虛內以事外丁亥拜倫簽樞充奉護梓宮兼迎皇太后交割地界等使戊子遣判大宗正士襄兵部侍郎張



燕詣河南修奉陵寢災寅賜世忠俊光世三功臣名號復張洙  
左宣奉大夫壬辰加岳飛吳玠並開府儀同三司沂中太尉甲  
午金守宿州趙榮來歸丙申河南諸州歸我故地戊戌就拜倫  
東京留守郭仲荀副之梁汝嘉兼江淮荆浙閩廣總制使司農  
卿霍龜爲判官二月癸丑命徽猷閣待制周率宣諭陝西監察  
御史方廷實宣諭三京淮北甲子均定諸州縣月椿錢壬申命  
修徽宗實錄日中有黑子月餘乃沒江西統制官李貴以其軍  
歸楊沂中三月丙申王倫至汴金授以東西南三京壽春宿州毫  
曹單州及陝西京西之地兀朮自祈州渡河還己亥分所得河  
南地爲三路甲辰僞齊知開封鄭億年上表待罪召赴行在奉  
朝請丁未正僞齊所改州縣名夏四月壬午僞鄭延經畧開師  
古陝西制使張中孚秦鳳經畧張中彥皆上表待罪復命師古

知延安府中孚知永興軍中彥知渭州甲子孟吏兼東西京路  
允迪南京皆充留守五月庚寅奉迎東京欽先孝思殿累朝御  
容赴臨安六月己巳兀朮至金密奏撻懶宗磐交通宋國割地  
議和必有陰謀今使已至汴未可令過界秋七月丁亥金人拘  
王倫於中山八月丙辰金誅撻懶等世忠欲乘其解繫之檜與  
帝意不許庚午遣蘇符等使金賀正旦九月丙戌士褒等還上  
問陵寢何如燕不答帝爲黯然庚寅罷經制司令提刑兼領常  
平事冬十月金拘王倫於河間遣其副藍公佐歸議歲貢正朔  
誓表冊命等事十二月甲寅命續編紹興因革禮續修元豐會  
要戊辰兀朮留蘇符等於東京謀復取河南是歲慕容洵寇環  
州夏罔府州鄜延副將李世輔與夏國招撫王樞同赴行在賜  
名顯忠樞入見併其俘皆縱遣還夏國

十年春正月檜專政名徽宗御制閣曰敷文丙戌遣莫將等迎  
護梓宮并奉迎兩宮二月命劉錡東京李顯忠南京皆爲副留  
守孟庾知開封府仇會知河南府壬戌詔新復州軍蒐舉隱逸  
經理屯田丁卯罷史館以日曆歸秘書省置監修國史官三月  
戊子增印錢引付撫司市軍儲丙申蘇符等還朝世將屢疏金  
必渝盟宜爲備己亥以郭浩知永興軍楊政知興元府夏四月  
丙午訪求亡逸曆書及精於星曆者五月己卯兀朮等分四道  
入寇秦檜懼以去就未可卜令馮檣探上意使召張浚帝作色  
曰寧至覆國不用此人檜聞大喜自是奸計益安公論不能動  
檜矣乙酉兀朮入東京孟庾又知興仁李師雄知淮寧李正民  
并河南諸州相繼復降京湖忠義統領李寶敗之於興仁境上  
丙戌陷拱州守臣王慥死之撤離曷自河中趨采與陝西州縣

亦降世將自河池遣涇原經畧田晟以兵三千迎敵丁亥陷南  
京路允迪降己丑陷西京留守李利用副總管孫暉皆棄城走  
鈐轄李興率兵拒戰癸巳知亳州王彥先叛金趙鳳翔丁酉移  
世將陝右護軍還屯蜀口聽便宜黜陟處置與璘同節制陝西  
諸路軍馬並兼世忠俊飛河南諸路招討使劉錡引所部王彥  
八字軍及殿前司卒兼程而進至順昌與守臣陳規共議捍禦  
檄令擇利班師錡不奉詔壬寅金烏祿圍順昌錡力戰敗之六  
月乙巳錡將闔充復捷於順昌之李村己酉璘將李師顏捷於  
扶風拔其城壬子兀朮自引兵攻順昌錡又敗之由是喪氣乙  
卯解圍悉徙珍寶北還意欲捐燕以南棄之捷聞加授以官卽  
命知順昌府轉規知廬州丙辰飛將牛皋捷於京西己未浩將  
鄭建充復醴州甲子撒離曷攻青谿嶺鄜延王彥勝之還國慶

陽宋萬年固守不能下世忠統制王勝背嵬將成閔又遇金人於淮陽南擊敗之是月岳飛復蔡州閏月癸酉朔俊統制宋超捷於永城縣朱家村甲戌追孟庾路允迪官徙流家屬丙子犯涇州守臣曲汲棄去田晟授兵敗之甲申晟再戰復其城丙戌王德攻宿州夜破之降其守馬泰已丑永興鈐轄傅忠信等捷於華陰縣壬辰飛復潁昌府丙申又復淮寧府丁酉飛又遣統制郝晟等復鄭州知河南府李興復汝州再敗金人於河清復伊陽等八縣李成遁去世忠遣統制王勝王權克海州執僞守王山秋七月癸卯飛遣將張應韓清入西京會李興復永安軍永興統領辛鎮又敗金人於長安城下己酉飛及兀朮大戰於鄆城縣敗諸酋兵及鐵浮圖拐子馬兀朮大慟合兵十餘萬次於臨潁梁興時已渡河敗敵於坦曲於泌水太行道絕飛又敗

之於朱仙鎮兀朮引去上與秦檜一意主和累遣使詣軍中諭旨班師壬戌遂自郢城還軍鄂州金人追之不及穎昌蔡鄭諸州復爲金有趙秉淵棄淮寧而南辛未犯盤屋縣王俊邾之於東洛谷八月壬申朔張九成喻樛陳剛中凌景夏樊光遠毛叔度元盥等七人不主和議降黜之壬午李成犯西京興擊却之丁亥金屠宿州甲午川陝統領王喜等敗金人於汧陽縣九月壬寅朔遣起居舍人李易諭世忠等罷兵諸大帥皆還鎮戊申金復入西京李興棄城去庚戌合祀明堂大赦辛酉臨安火冬十月戊寅秦檜上重修紹興在京通用勅令格式庚子金襲洮州攻鐵城堡統制孔文清惠逢擊敗之十一月丁未合喜犯陝州吳琦擊却之又犯寶雞渭南政遣統制楊從義敗之十二月壬午上皇太后冊寶於慈寧殿辛卯起諸路耆長役錢隸總制

司專給軍用是歲福建廣東盜起宜章洞民略科犯桂陽郴道  
進賀諸州命發兵討之

十一年春正月檜專政乙卯兀朮山壽春府渡淮復陷廬州戊  
辰陷商州守臣邵隆遁俄復之己巳命沂中赴淮西飛屯江州  
二月癸酉金退師昭關癸未田師中等進兵奪之甲申敵復來  
犯王德等又敗之李顯忠遣統領崔阜敗敵於舒城丁亥金軍  
柘皋錡及沂中大捷己丑兀朮自將逆戰於店步又敗之乘勝  
逐北遂復廬州三月庚子朔俊進鷲山及寶慶牒錢六十三萬  
緡助軍川甲辰議班師沂中與錡先還行在俊輕兵留後丁未  
金陷濠州執守臣王進翳其城鈴轄邵青死之壬子渡淮北歸  
甲子行宮張彥遇金兵於汧陽之劉坊砦第八將張宏戰沒夏  
四月壬辰除世忠俊並爲樞密使飛爲副使罷三宣撫司改統

制屬御前各屯駐舊所五月辛丑置兩淮江東西湖廣京西三道統領軍馬錢糧官仍掌報發御前軍馬文字癸卯賻恤戰沒將士丁未遣俊與飛巡視楚州邊防毀海州城遷其民甲寅置樞密行府於鎮江統諸將兵惟背嵬一軍赴臨安秋七月戊戌檜上徽宗實錄與修撰以下各進官九月癸卯王俊上變告張憲張俊收以屬吏辛亥璘拔秦州降其將武誼政克隴州破岐山諸屯浩復華州入陝驛書至悉詔班師乙丑邵隆復陝號二州冬十月泗與楚復陷丁卯朝議以莫將還遣劉光遠等使金軍前乙亥遣還復遣魏良臣王公亮爲金國稟議使戊寅下岳飛張憲於大理獄命中丞何鑄大理卿周三畏鞠之十一月己亥安璽劉弘道於柳州辛丑兀朮遣審議使蕭毅邢具瞻與良臣等偕來壬子始定議各守疆土立盟誓約畫淮水中流爲界



割唐鄧二州界之歲率銀絹二十五萬兩匹休兵息民乙卯何  
鑄進密院簽書充金國報謝進誓表等使庚申命宰執以誓文  
祭告天地宗廟社稷詔川陝撫司毋再出兵生事招納叛亡及  
罷便宜行事十二月乙亥兀朮遣鑄等如會寧見金主遂同周  
聿莫將鄭剛中分畫京西唐鄧陝西地界癸巳擒殺岳飛

冊曰時有廢興理無自絕蠹國遂奸忠臣泣血大宋遺民  
靡有遺孑自茲以往南北判別